




Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com



TAPAK 8

Putin-i 2036 tashi yimsü asütsü temeden agütsür



TAPAK 7

Covid-19 agi shirangertem yaritsü atema Plasma tenlatsüla: Kejriwal

VOL. XVII NO. 246 (ADOK 246) DIMAPUR

ROGONÜ (FRIDAY) CHITENI (JULY) 03, 2020

₹ 5.00

COVID-19 Nagaland: nisung 34 dak +ve putet

Kohima, Chiteni/July 02 (TYO): Nagaland nung Brestobarnü nisung 34 dak COVID-19 tashidak puteta tang state nung iba tashidak agi menep ajak senteper nisung 535 jungogo.

Item rongnung tang active cases 338 lir aser taneptsü angur nisung 197 lir, ta state health ketdangsertemi sangdong ka ajanga ashi.

Tanü sample 226 tendangba nungi nisung 34 dak coronavirus aliba jangjatet, ta Minister, Health & Family Welfare, S Pangnyu Phom-i Brestobanü ashi.

Tanü puteter rongnung Peren Quarantine Centre nungi nisung 32 lir, Kohima aser Dimapur quarantine centre tem nungi kaka lir, ta pai ashi.

Health ketdangsertemi ashiba agi, coronavirus agi shiranger nisung 15 - Kohima nungi 12, Dimapur nungi ana aser Peren nungi ka dak iba virus maliba jangjateta tang state nungi iba tashidak nungi taneptsü angur ajak agi nisung 197 lir. Nagaland nung iba tashidak nungi taneptsü anguba rate ya shilem 36.82 lir.

District telemsa nung tang iba tashidak agi menepa aliba (active) yamai alitsü: Peren 146, Kohima 95, Dimapur 41, Mon 38, Tuensang 20, Phek 9, Zunheboto 3 aser Mokochung district nung ka, ta Health Department ajanga sangdong ka nung ashi.

Active cases ajak ya asymptomatic (shirangba yimya/timtem mali) lir, ta sangdong ajangasa ashi.

NDC-i Dimapur Tribal Apex Hoho magizüker

Dimapur, Chiteni/July 2 (TYO): Naga Council Dimapur (NCD)-i, parnok Councilors tem dang Dimapur Tribal Apex Hoho (DTAH) den tesendaktep mayutsü asoshi mepeshia metetdaksüogo, kechiyong Naga Council Dimapur-i, Dimapur Tribal Apex Hoho ya magizüker, shirnoki tang asenok lokti libaliro raksatsür aser lokti yimjung nung aliba menentsür aser Naga Council Dimapur ya dang Dimapur district nung Naga nung lokti tentet temaba lir, ta NCD tir T. Bangerloba aser

General Secretary Thspongkyu Sangtam nati sangdong ka ajanga metetdaksüogo.

Council-isa, temzüng ozüng sülen anidakba sangdonger aser züngsemtem dang iba anema inyaksangshi masütsü tetuyuba agütsür. Naga Council-isa, Dimapur Tribal Apex Hoho (DTAH)-i July 3 nü I.M.C hall Dimapur nung senden ka amentsü asoshi ayonga aliba nung oa madentsü asoshi Councilors ajak dang mepshia metetdaksür, ta kasa sangdong ajanga metetdaksü.

BJP tir-i telongjem asoshi ayongzük

Kohima, Chiteni/July 2 (TYO): Nagaland BJP tir Temjen Imna Along-i tanü Naga nung ajak dang state nung Assembly Constituencies delimitation ken o dak sendakba nung kin dak masü saka Naga nung rangben dak ranloktsü mepeshia asüngdangogo.

Nagaland nung kin 14 telongjem wazüka toktsütsüji mapang tongtibangtiba asütsüla, ta Along-i tanü BJP State Headquarters nung osangbenertem den sensaksemba mapang ashi.

"Naga nung yimden yimsüsüba tsütsü telemtetba ka agitsüji tongtibangtiba aser tang telemtetba ka agitsü ana nung aliba mapang kin 14 lemsatsü ya tim masü ta bilemba aikati lemsateper," ta pai ashi.

State nung aliba nüburtem ajaki Framework Agreement sensaksem tembanga, telemtetba ka agitsü yongyaa atateper aser kasaji Nagaland nung BJP party atemaa tinyaktsü tongtibangtiba rongnug iba ya ka lir, ta pai ashi.

Delimitation amala ken o ya Naga nungertem kin dak

ajemdaker lemdangtsüba ken o ka mesüdaktsütsü mepeshia pai Naga nung ajak ya adianu lir ta ashi. "Ken o kechi nung südir süaka kin sentsü ya benokra asenoki asüng Nagaland asoshi asenok tebilemdangba lepa reprangshitsüsa akümtsü," ta BJP tir-i ashi.

Delimitation ajanga Naga nung koda lemdangtsü ta asüngdangba mapang pai, "delimitation ajanga Naga nung lemdangtsü mesera melemdangtsü ta ashir masü, ni shinübjaji kin 14 telongjem ya ajak dang alia jakteta adoktsüla. 2001 küm census magizükba sülen August 3, 2015 küm NNPG tem den Framework agreement yanglu aser October 2019 küm tatembang küma jembishiner tang asüngtetshiba mapang ka lir aser iba ya ajak dang tongtibangtiba lir," ta pai ashi.

"Lemdangtsü mesera longjemtsü ya kin balala lenir shisatsü dak keta lir. BJP party-i iba dak sendakba nung kecha meshitetsü aser ashitsü asoshi BJPParty mapa masü," ta Along-i ashi.

Taküm kümzüksü ya mezüngbuba teinyaktsü asütsü: Anoop Kinchi



DC Dimapur Anoop Kinchi IAS ajanga July 02, 2020 nü DC Dimapur indang conference hall nung Dimapur DDMA züngsemtem den jembiba mapang tangokba noksa ka yangi angur.

Dimapur, Chiteni/July 02 (TYO): Deputy Commissioner, Dimapur, Anoop Kinchi IAS ajanga July 02, 2020 nü DDMA züngsemtem den senden ka mena taruba hopta ana tsüngda tzünglu kanga sashia arua tzümettsüng adoka mopung tesashi aontsü akok ta asadangteta nung ajemdaker renemshia alitsü asoshi onük balala lemsatepa liasü.

Mendenpuba sür senden agiba mapang Anoop-i ashiba agi, alimar lendong kar danga ajurura nisung taküm kümzüksü ya mezüngbuba teinyaktsü asütsü aser iba sülen ki-o-jen aser danga arutsü.

Anoop-i Power department dang ajungben nungdak atema

emergency team ka tentettsü totuyuba agütsü aser parnok dang süngdong laoba mapang nüburtem kümzükba alitsü mechi laotsüsa aliba jangjateta tekeratiba nung osang agütsütsü metetdaksü aser pai aliba tesem nung preparedness plan yanlutsü ajungshi. Maneni Deputy Commissioner, Dimapur ajangasa PWD dang Balijan, Dhansiri aser Nagarjan apu indang osang agütsütsü ashi.

Lendong timtem kar danga ajurura yariteptsü molunga aliba Home Guards department aser Dimapur Municipal Council

ajanga ashi aser DDMA Dimapur nungi senotsü teyari agütsüba indanga senden nung jembiba aser DC-i parnok den yariteptsü shia liasü.

Kasa senden nungsa ADC Niuland, Athrila-i Balijan apu tashi itshia yanglutsü indang süok aser Niuland tsütsü aliba nüburtem atema lenmang ibai dang lir, ta ashi. Laisa Niuland aser Hovikhu village tsüngda aliba sangzua aliba apu yanglushitsü ashi.

ADC, Medziphema ajanga anentsü tulu aluba mapang nungdakba osettsüset belentsü asoshi lenmang danga kar anepalua ayutsü ashi. Assam Rifles aser CRPF temia nungdakba mapang yaritsü molunga aliba lemsatepogo.

Naga yimtenren nüchiso atema raraba meremseptsü: NSCN/GPRN

Dimapur, July 02 (TYO): Shisatsü agi merajemi Ravi-i inyakteta mapatem atema onoki nungnanga pa nem tenüngsang agütsür, iba denji külemi Ravi jenjang ajungketba atema pai yimjak nung Naga nung dang pelaba lemsateptsüla, ta Military spokesperson, NSCN/GPRN, Nikato Pilot Sumi-i sangdong ka ajanga metetdaksü.

"Küm 200 jungnüa tanü tashi Naga nung yimtenren temeden aser maitsü atema raraba arur, aser ibaji meremseptsü. India ya linük ka makümdangyongi aser India temzüng meyangludangyongi Naga nungeri British nung den sovereign temeden atema rara. British Raj mapang nunga British

nungeri parnok indang temzüng kübok Naga areas bo toktsütsü lemteta excluded areas ta züngshi, anungji India temzüng nung aliba Arlla ajanga Naga nung maneni amokmerenbaji temenünüsüka lir," ta kasa sangdong nung shia lir.

"Tesüba küm 70 dak tema taoba mapang Ato kilonser 13-ia Naga nung yimtenren onük latettsü makok, saka Ravi-i pasasa pa kijai Naga yimtenren onük latettsü ama mezümeküma bilemba shisatsü nungi ajemalutsüla," ta sangdong nung shia lir.

"Ravi-i India nung nisung tamajunger teloktem aser Naga nüchiso atema rarartem na

medemdanga jembibaji ajanga taoba mapang IPS officer ka tangatetba ama masü saka pa dak mashimalu aliba shisanger. Taküm alitsü atema aazüka Naga areas nung aliba mapang nung Naga institutions aser sobaliba akhümtsübu nungdak. Nagaland state nung aliba Naga nung yimten lenirtem, ketdangsertem, melungtet telok balala nungi lenirtem aser security sepaitemi pei maitsü mesüra onük koba tongtibangba kümdaksür- Naga asü Indian, aser parnoki shimba nungji ajemdaker parnokji Naga nung mesüra Naga nung masü ama züngshitsü," ta kasa sangdong ajangasa metetdaksü.

JSS, JYO aser JKM ajanga metetdaksür

Dimapur, Chiteni/July 02, 2020 (TYO): Delimitation ken o dak sendakba nung, tashishiba aser jangjashitsüba inyakyim aika osang kaket aser social media ajanga angazüka arudar. Atangji nunga, iba dak sendakba nung medemdanga tashishibatem liasü, aser tai tongloktetsüpeba aser jangjashitepba ajanga Naga nung mükemzüksü, ta Japukong sensosanger tenüng nung

Japukong Senso Senden, Japukong Youth Organization aser Japukong Kaketshir Mungdang ajanga sangdong ka nung metetdaksü.

Minister Temjen Imna Along ya Japukong nung senso tajung ka lir, anungji kari danga pa jenjang raksatsütsüsa sentong tamajung atongba aser lokti atema pa tebilemba jembiba asoshi tiyazü kuli nung pa aitsütsü

merangba maparen kecha Japukong sensosangeri memelatsü mesüra tai madoktsü.

Japukong Senso Senden, Japukong Youth Organization aser Japukong Kaketshir Mungdang temi pei senso shinga anema jembitsü mesüra tarutsü anogotem nunga ashishiteptsü asoshi kija mesüra telok dang memelatsü, lokti asem tirtemi sangdong ka ajanga ashi.

PM-i ita 5 jang angati agütsütsü sangdongba pelaa agizüker: Nagaland BJP

Kohima, Chiteni/July 02 (TYO): Ato kilonser, Narendra Modi-i Padhan Mantri Garib Kalyan Anna Yojana (PMGKY) ita pongu atsülanga linük tesem

ajungalen nisung crore 80 nem angati ration agütsütsü sangdongbaji Nagaland state BJP unit-i pelaa agizüker, ta Nagaland BJP-i metetdaksü.

Brihostibarnü Kohima nung aliba State BJP Headquarters nung osangbenertem senden nung jembidang State BJP Tir (Maneni tapak 2 nung...)



CORONAVIRUS WARA ASENOK LONGJEMER AKOKTSÜ ASOSHI -

Quarantine nung amongertem ya shirangertem masü, parnok tesemba. Covid agi shirangertem tetsübu, Corona tashidak mesenang tsübuang.

- In collaboration with the Media Cell, RD department, Nagaland



DIMAPUR AREA AO BAPTIST CHURCHES & AO CIVIL SOCIETIES CO-ORDINATION COMMITTEE ON COVID-19 TEPELA O LEMSATEPER :

Dimapur Area Ao Baptist Arogotem aser Dimapur nung tenteta aliba Aor lokti tettem longjemer Dimapur Government College nung June 1 nungi 20, 2020 tashi Quarantine Center asem tashi lapoka anepaluba maparen nung Tsüngrem taochi adenba asoshi Pa nem tamasa tenüngsang agütsür aser Naga nunger senso tajungtem aser talisa, Aotsür Aortem shirnokisa temeim agi mulungsa sarasadem, nübo aser rongsen agi onok timmedemdaktsüi yaritepogo, nenok ajak dang Dimapur Area Ao Baptist Churches & Civil Societies Co-Ordination Committee On Covid-19 tenüng nung kanga pelaba metetdaktsür. Atangji, ibai alima wara tesashi anema nokdakba tongpang nung shilem agütsü asoshi Nagaland government-i arogo aser lokti tentettem dang mepishia metetdaktsüba langzüka, asenoka aseni akok, mapa tuluka nung mesüka, nübortem yariba temoatsü mapang tajung ka liasü.

Asenok quarantine center nung Naga kin balala nungi aser Naga nunger masüba purtema dena parnok jala jabsotem ajak agi 245 liasü. Parnok anogo 20 tashi kechalenia moi quarantine center nung amongdang, parnok ajaki sentong ajak nung tashi angaa amongba asoshi parnok dang kanga pelar.

Iba quarantine center nung amongertemi alima lipüküm anogo (World Environment Day) June 5, 2020 nü quarantine centre meketa Dimapur Govt College campus nung süngdong 100 tema yutsüba mapa jagi tarutsü anogotem nung tanü quarantine mapang Tsüngremi aochiba agi temoatsü ngua amongba anogotem bilemtettsü. Ano, talisa quarantine nung amonger jala jabsotemi asenok dang 'Kanga Pelar' ta züluba shiditem den parnoki temulunger tenla aika sarudena agütsüba agizük dang kanga temoatsü nguogo. Item shiditem aser senji tarutsü mapang nunga, tanü asen putu nung alima tasüba wara agi amokmerendang, asenok dang Kibubai ajungba mapatem bilemtettsüsa rezüngtsü telemtetba agiogo.

Ajak dak alaka, Quarantine center lapoka Covid-19 tongpang nung nokdak dang, nungdak ajak peritsüsa rongsen tenla tulu agütsüba asoshi item kija, kibong aser lokti tentettem den pelaba lemsateper :

1. Mr & Mrs. Metsubo, Minister, RD
2. Mr. Moatoshi Longkumer MLA.
3. Mr. Temjen Imna Along, Minister, Nagaland.
4. M/S.Kalptree Pvt Ltd. C/o. Mr. Rusemtong Lkr.
5. Mrs. Asangla Imti
6. Mr & Mrs. Supu Jamir (Ungma).
7. Mr & Mrs K.Tsukti Jamir (Mongsenyimti).
8. Ms. Chungmina Lemtur
9. Lt.Col. Temsü Aier & Family
10. Er/Mrs.Along Imti & Children
11. Mr & Mrs. Chuba Aier (Mopungchuket)
12. Mr & Mrs.Watitemjen (Khar) Indisen
13. Mr. Imti Jamir (Changki), 4th Mile Dimapur.
14. Mr & Mrs. K.Imtiwati Jamir (Akhoya)
15. Ms. Abenla (Mopungchuket) Monalisa Business Solutuions
16. Mr & Mrs Sashi (Changdang)
17. Mr & Mrs. Aoinla (Mongsenyimti)
18. Mr & Mrs Medem Aier (Longpa), Dipuphar
19. Mr. Lanu Tzudir (Moayimti)
20. Dr. Arenla (Mopungchuket)
21. Er & Mrs L.Moamanan Imchen (Mongchen)
22. Rev & Mrs Yanger (Khar) Eklavya Model Residential School, Diphubar
23. Wt. Narola (Mangmetong)
24. Wt. Sentila (Mopungchuket) Aier Bakery
25. Mr. Purkumzuk Longkümer (Longsa)
26. Ungma Senso Telongjem Dimapur
27. Dimapur Mongsenyimti Senso Telongjem
28. Dimapur Molungyimsen Senso Telongjem
29. Longsa Senso Telongjem Dimapur
30. Dimapur Süngratsü Senso Telongjem
31. Kangtsüng Senso Telongjem Dimapur
32. Mejenpur Telok
33. FootHill Ao Lanur Telongjem Dimapur
34. Esung Telok SHG -
35. Qurantine nung amonger jala jabsotem (Returnees)
36. Merangkongtsür Telongjem Dimapur
37. Mokokchung Tetsür Telongjem Dimapur
38. Esa Telongjem volunteers, Chumukedima
39. Oriental Colony Council & Youth
40. Ao Kaketshir Telongjem, Dimapur Government College
41. Tenhuner Welfare Society, Dimapur (Kangtsüng)
42. Dimapur Watsu Telongjem kübok aliba Yimtsüng balala nungi Tetsür Telongjemtemi kiojen merüketba aser soruchiokba mapatem nung yaritepba asoshi kanga pelar.
43. Nagaland State Rural Livelihood Mission (NSRLM) & NEPED
44. Christian Education Ministry & Sungti Kongru, DABA.
45. Divisional Forest Office , Dimapur.
46. Nungdakba kiojen, osettsüset aser chibo anpu angati tenla agütsür lokti tentet aser kija kibongtem ajak dang maneni pelaba shisemer.

Quarantine center asem tashi nung ita junga jala jabsotem anepaludang, maparen kecha nunga tapok mepadaktsüi bendanga agüja yaritepba asoshi Wb. Temjen Toy IAS, Chief Secretary; Empowered Committee Covid-19 Dimapur District nung lenir Wb.Y.Kikheto Sema IAS. APC aser Wb. Honje Konyak, NCS Secretary, F&C.S; Dimapur Govt. College nung tongti ketdangsertem; Medical doctors aser Protocol Officers ajak dang kanga pelaba lemsateper

Asenok ano maneni Covid-19 tongpang nung nokdaka lir, anungji asenok taküm aser sentongtem ajak, Kibuba dak dang temulung lema, Pa nem bendanga agütsüshidi, "kechiyong Kibubaji dang asen jenokdak Long aser asenok Miitsa, aser asenok Kümzüksang. Shirnoki Kibuba dak dang temulung alemer, Paji parnok asoshi Jung lir." (Tenüngsang Ken 18.)

KANGA PELAR

Sd/-
SUPU JAMIR
Convenor.

Sd/-
IMTI JAMIR
Secretary.

School, Education Dept-i survey ka agütsü

Dimapur, Chiteni/July 2 (TYO): Principal Director School, Education Shanavas C, IAS-i sangdong ka ajanga, May 2020 nungi tenzüka Tele/Radio Online Education agütsüba ajanga nisung kwi ayimjemmer, ibaji jangjatsü asoshi survey ka agütsü Department-i benokdangba metetdaktsüogo. Iba sentong ajanga state nung kaketshirtem timba tongjema ajangzükdaktsütsü nükjidong nung iba survey agir.

Anungji Govt. Higher Secondary Schools aser Govt. High Schools tekolak ajak dang

July 3 nungi 5 tsüngda, <https://dosenl.in/> nung agüja aliba DoSE Survey' link-i login süa, portal nung tasüngdangba ter inokja aliba langzüksü tetuyuba agütsüogo.

Temalen shisema aliba institution tekolaktem atema iba tetuyuba ya compulsory asütsü aser tasüngdangba tem atema atakzükja aliba mapang nung telangzüba shidak agütsütsü tuyuogo, kechiyong state mokdanga aliba mapang kaketshir ajak nem kaketsütsü agütsütsü asoshi iba inyakyim benoka inyaker, ta kasa sangdong ajanga metetdaktsü.

Gari kanga kara anishiba lendong ka nung tetsür ka yiru

Kohima, Chiteni/July 2 (TYO): Yashi Kohima yimti kübok High School junction nung nisung kati gari mekümdangi anishia, tetsür ka dak atsükba den gari pezü raksatsüba sülen Kohima police iba nisungba ya puogo.

Police sangdong ka ajanga ashiba agi, aija alisang ya Kohima district kübok Phekerkriema yimtsüng nungi Viketuolie (32) ta jangjaogo, aser pa yashi nikongtsütsü 6:00 ako meta puogo.

Police temisa, aija alisang yagi gari kanga karaa ashishiba ajanga tetsür ka yirutsü aser gari asem den scooty ka raksaja liasü, ta ashi.

Iba lendong nung tasüba osangbo kecha mali, saka tetsür la ya lendong atalokba tesem anasa mozüki kati anir ao, kong la temang anepaludar.

Aija alisang anema ken o ka benokogo aser ken o maneni bushitsüngdangdar, ta police-i metetdaktsü.

Angh-i züluba shiti ngua JDU süngmaner

Dimapur, Chiteni/July 2 (TYO): Nagaland Angh R N Ravi-i June 16 nü Nagaland Chief Minister Neiphiu Rio dangi züluba shiti ngua, Janata Dal United (JDU) Nagaland süngmaner, ta JDU sangdong ka ajanga metetdaktsü.

Interlocutor cum Governor-i, taoba küm ishika yimjung asoshi Naga nunger telok balala den inyaktepa arudar aser tang kasa telok dang pai "armed gangs" ta ajaba aser nüburtemi shimba sorkar den jenjang ka nung ozüng alema sorkar kümteter inyaksangshir ta ashiba ya Interlocutor-i mejimbütsü oka masü ama bilemer, shibai pa nem nongloksüba maparen nung yimjung nung telemtetba ka agütsü jemba arudar aser iba ajanga pai Naga nungertem nem mapang aben timla agüja arudar.

Iba shiti ajanga pai tongpu apur inyaka aliba yimjung ken dak sendakba nung pa tamendakdak jangja jangja sayuogo. Iba shiti ya pa mapa bendanga agütsüba den kasa lir. Naga Nationalists aser India

sorkar na tsüngda tang yimjung asoshi jembishinüa aruba asoshi telemtetba ka agütsü atema Government of India Interlocutor-i timla makba iba shiti ajanga sayuba angudang kanga jashia bilemer. Iba shiti ya Naga nungertem asoshi kanga tezüdangtsüka lir, shirnoki pa dak tamang akar aser akhümtsübur.

Kasa mapang nung Angh-i temzüng ozüng chirepogo ta jangjara, President Rule benoktsü asoshi temzüng ozüng ajanga pa nem nongloksür aliba mapa benoka inyaksü asoshi kechi agi pa nokdanger, ta JDU-i asiüngdangdar. Temzüng ozüng dak atemer pa office ajanga file tem bener aotsü asoshi shia tesülen nungi tashi amokbangtsü memerangi, Angh-i pai züluba onüktem süoiki ia bilemra tasüita jenjang tapet agütsüla. Ajita mesera temzüng ozüng ajanga shimba tekolakba ka nüburtemi shimba sorkar inyaksangshi nung shilem agütsü tim masü, ta JDU Publicity Wing ajanga metetdaktsü.

PM-i ita 5 jang angati agütsütsü... (TAPAK 1 NUNGI...)

aser Higher & Technical Education & Tribal Affairs Minister, Temjen Imna Along-i, tang ama coronavirus tensa nung PMGKY atsülangbaji sensakertem atema anisüngzük tulu, kechiyong sensaker kibong nungi züngsem shiai ration card liaka meliaka taruba ita pongu tashi ita shia wheat mesüra jang seret 5 den dal seret kaka angutsü, ta metetdaktsü.

"Nagaland-ia angati jang ngudar, kechiyong state nung yimtsüng shiai iba ration angur," ta pai metetdaktsü.

Modi-i jembiba lephsia Minister Along-i, sorkari taruba benjung mongpu November ita tashi sensakertem nem jang angati agütsütsü, ta metetdaktsü.

Sensakertem nem ita shia janga seret 5 den dal seret kaka agütsüba ajanga Central sorkar senpong nung sen crore 90,000 tali indoktsü, ta pai ashi.

Antyodaya Anna Yojana (AAY) aser Priority Household (PHH) ration card holders atema jangji Targeted Public Distribution System (TPDS) kübok beneficiaries nem agütsütsü.

Taküm April ita nungi June ita tashi (ita asem) temsüa alirtem nem ita shia jang seret pongu den dal seret kaka agütsü, aser maneni

ita pongu atsülangogo.

Coronavirus tensa mapang sensakertem nem angati jang agütsüba atema Modi-i aluyimertem aser saru agütsürtem tenüng tajung agidaktsüogo, ta shia Minister-i, "Ato kilonser den külemi state BJP lenirtem aser party-ia ochishia saru agütsürtem dang pelaba lemsateper," ta metetdaktsü.

Mod-i jembiba maneni lephsia pai, "asenoki rongsenkettsüng mapatem tuluba atemzükä inyaksü, Aatmanirbhar Bharat (Self- Reliant India) atema inyaksü," ta ashi.

Iba dak sendakba nung Minister-i, iba ya Nagaland atema- a kanga tapet, koba ajanga asenok "Self Reliant Nagaland" akümütsü aser Chief Minister, Neiphiu Rio lenisüba nung PDA sorkaria iba atemaji inyaker, ta ashi.

"Asenoki tangalen yangluba osettsüset nung metaloker alir. Anungji tang nungibo asenoki yanglutetba osettem amshitsü aser adokdaktsütsü atema inyaksüla," ta paisa ashi.

Tanü osangbenertem senden nungji Nagaland BJP vice president, Change Sangtam aser general secretary, Khevishe Sema nata densema liasü.



Kaziranga, July 2, 2020 : Kaziranga nung k ka tüzümsüng agi metsümbangba noksa nung angur. Assam kübok district 20 nung alir nisung lakh 12 dak tema tüzümsüng agi kangshidar. Kaziranga National Park (KNP) authority sangdong ka ajanga ashiba agi, tang tashi nung shiruru 25 tüzümsüng nung süogo.

Tripura nung kaketshirtem dang taa magitsü

Agartla, Chiteni/July 2 (Agencies): Tripura sorkari school/college kaketshirtem dang nungi school azünga taa ajemer agitsü asoshi telemtetba agiogo.

Iba jenjang agiba ajanga kaketshir aser tsürapurtem khuret tepungbaba kümdaktsütsü.

Taoba mpang state sorkari private school aser college tem dang, takümbo school fee majungkettsü atema mepeshiogo.

Tang state sorkari, sorkar meyong school aser college tem nung taa ajemer agitsü asoshi telemtetba ka agiogo.

Education Minister Ratan Lal Nath-i ashiba agi, COVID-19 wara agi timtem bener arutsü aliba asadanger, school aser college tem nung taa ajemer agitsü asoshi telemtetba

agiogo. Education minister-isa, state ajunga nung school aser tanga educational institutions ajak mapang tatsüka atema melapoki ataa alitsü, ta metetdaktsü.

State sorkari, educationists, mongintem, taoba mapang education officer and education minister tem, senior journalists aser ABVP, NSUI aser SFI nungi kaketshir lenirtem densema committee ka tentetogo.

Taoba mapang iba committee yagi school aser college lapokyonga aotsüba dak sendakba nung telemtetba agitsü ta metetdaktsü.

Iba committee senden ka Bodhbarnü amen aser committee züngsemtem ajaki state sorkari iba amala mejangjaba mapang ka nung

school aser college tem melapoki atatsü asoshi shia liasü, ta state education minister Ratan Lal Nath-i ashi.

Nath-isa, iba telemtetba ya sorkari kümtettsüba committee züngsem 39-i agia liasü, ta ashi.

Senden nung COVID-19 tensa apir educational institutions tem tang atemabo melapoki atatsü asoshi ajaki mulungtepa telemtetba ka agiogo.

Ajisüaka online class tem maneni agiyonga aotsü asoshi state sorkari inyakyim tasen benoka inyaktsü, ta minister-i shisem.

Education minister-i ashiba agi, state sorkari kaketshir 5,92,247 dang taa balala agia aliba ajak tai atoktsü aser ita shia sen 30 aser 35 dang agitsü latettsüogo.

Jala atema smartphone malitsütetba sülen nisung ka soseta asü

Agartala, Chiteni/July 2 (Agencies): Taoksatsü tatalokba ka nung Tripura nung arishi küm 45 tain aayanger kati lar jala online class nung adentsü asoshi smartphone malitsütetba sülen soseta süogo.

Sepahijala district nung Madhupur police station kübok Rajnagar Purathal yimtsüng nung alir Sukumar Bhowmik Mongolbarnü soseta asü.

Police temi ashiba agi,

Bhowmik'er arishi küm 15 tain jalai tebu dang la online class nung adentsü atema smartphone ka alitsütsü asüngdang, saka pai malitsütet kechiyong Covid-19 tashidak prokshia meyoktsü asoshi state mokdanga aliba ajanga pa ayangdak makai kümer liasü.

Linük ajunga mokdanga ayuba sülen school timbaka nung online class agütsü tenzükogo.

Mongolbar aonung

Sukumar-i par jala atema ordinary mobile ka alitsü saka la class atema smartphone ka nüngdaka liasü.

Mongolbar aonung Sukumar chia mechiyong aser pa semtu balaka nung oa mejang, kong pa soseta asü, ta police ketdangser kati ashi.

Pa Bodhbar anepdang soseta sür lia ngutet. Par kinunger parnok pongu rongnung Sukumar kijai aayanga parnok chiyonga liasü.

Ambulance kanungaonsotsü, an aser ango yoka lia apu

Guwahati, Chiteni/July 2 (TYO): Assam Kamrup (Metro) district anogo 14 shibanger aliba mapang Brehistibarnü Guwahati kübok Ganeshguri tesem nung police temi ambulance ka puogo. Osang ajanga ashiba agi, iba gari ya shiranger belenshitsüba atema masü saka anosotsü, an aser ango ayoktsü asoshi amshia liasü.

Iba ambulance ya Brehostibarnü Dispur Hospital anasa 11:40 ako shia nung pua laisü.

Ambulance nung anosotsü, an aser anogo sünga bener liasü, koba Ganesguri nung

alirtem dang ozüng alema yoka liasü. "Osang tejangja ka angazükba sülen police temi iba tesem meita ao aser parnok nisung pezü anosotsü alia aliba angu," ta Himangshu Das, ACP, Dispur-i ashi. Ajisüaka yokyatsüyartem aser lichaliyonger tem ambulance toktsür iba tesem nungi jena oadok.

Union ministry of road transport-i ashiba agi, iba ambulance ya Lohit Das tenüng nung züngoksema lir.

Iba sülen police temi ambulance den chiyongtsü balala apu aser tang aibelenertem aputsü bushiba mapang ka lir.

Mizoram: Taoba Assembly Speaker Upa Rokamlova süogo

Aizwal, Chiteni/July 2 (Agencies): Taoba Mizoram Assembly Speaker aser nüngtugu Arogo lenir Upa Rokamlova, Bodhbar aonung Aizawl kübok mozüki ka nung süogo. Pa tezüng tashidak agi mapang talangka kangshia arur arishi küm 79buba nung iba lima nungi pilaaogo.

Pai kinungtsü aser jala jabaso ana toktsür süogo.

Par kinungertem nungi osang ka ajanga ashiba agi, pa temang mejungi akümba ajanga Aizwal nung Ebenezer Medical Centre-i May 12 nü anir ao. Pa tezüng tashidak agi 2015 küm nungi kangshia arua liasü.

Pa Bodhbar aonung 7:42 nung iba lima nungi pilaa ao.

Pa den asüpila sentong Brehostibarnü Aizawl kübok Dawrpui tesem nung par kidang agia liasü.

1965 küm Master degree anguba sülen Romkalova ya Shillong nung Synod College nung lecturer ama inyaka liasü.

Pa 1968 küm nungi Pachhunga Memorial Government College (tang Pachhunga University College) nung inyak tenzük aser 1973 küm vice-principal aküm.

Maneni pa 1978 nungi 1981 tashi Aizawl college nung principal ama inyaka liasü.

Pa tesayur mapa toktsüba sülen yimden yimsüsüba mapa nung 1980 tetenzüklen nungi shilem agi tenzük aser centre o Mizo National Front (MNF) na tsüngda 1986 küm June ita Mizo peace accord tenangzüktepba yaglubu nung pai tongtibang shilem agia liasü.

Pai 1984, 1987 aser 1989 küm state assembly election kokogo aser Lal Thanhawla indang cabinet nung rural development aser transport minister mapa aben.

1990 küm pa state assembly speaker kümdaktsü. Pai 1994 küm yimden yimsüsüba mapa tokja liasü.

Upa Rokamlova, shiba dang "revivalist," ta jaa liasü, pai Arogo maparen balala nung shilem tajung agiogo.

1970 küm pa Dawrpui Arogo nung arogo tambur ama ordain

asü aser Mizoram Synod kübok mapa balala bena inyakogo.

Shirangertem kidang anepalutsü nübu peria mali: Sarma

Guwahati, Chiteni/July 2 (Agencies): State nung COVID-19 agi shirangertem kidang quarantine süa achaayangtsü asoshi nübu peria mali ta shia, Assam health minister Himanta Biswa Sarma-i, metsümeshidak ka dang amshiba kidang tashidak prokshia aotsü kanga ana nung lir, ta ashi.

"Tera dang shirangertem kechiba kidang yur anepalu mesütettsü ta tasüngdangba lir.

Auh metsümeshidak bendanga aliba ki kar nungbo akoktsü.

Ajisüaka Guwahati nung Pandu, Dhirenpara, police barracks amala tesemtem nungi tashidak aketer timba potetdar. Onoki parnok kidang meyetettsü kechiyong parnok ajak metsümeshidak ka dang amshir," ta Sarma-i ashi.

Kidang metsümeshidak balaka liaka, sorkar ket nung jungdak mapang shirangertem anepalutsü asoshi nübu peria mali, ta pai ashi.

"Shiranger ka temang mejungi akümba mapang pei kidang nungi mozüki bushia anir aotsü asoshi medical staff peria mali. Covid care centre tem nungbo shirangertem teti asadanga alir," ta pai ashi.

Bodhbarnü minister Sarma-i Guwahati kübok Khanapara field nung yipden 900 aketba COVID-19 mozüka semzüktsüogo. Yimti nung anogoshia tashidak tali potetyonga aoba ajanga iba mozüki kanga nüngdaka liasü.

Iba mozüki lapokba sülen Guwahati nung COVID-19 agi shiranger 1,538 anepalutettsü. Mozüki tasenba nung metsümeshidak den atonga nisung shia takdang balala agütsütsü aser iba ajanga tashidak prokshia aoba nungi kümzüktsü.

Maneni State sorkari Maniram Dewan Trade Centre, Guwahati nung yibden 450 aketba COVID19 care hospital ka amenoktsü asoshi sentong lir.



Guwahati, July 2, 2020 : Brehostibarnü Guwahati nung Fireman temi Beltola lenmang merketetba noksa nung angur. Assam nung coronavirus tashidak kanga kara prokshia odar aser defence o police densema nüburtem aikadak tashidak potetdar. Tang tashi nung police 95 dak tashidak potetogo aser parnok 1112 quarantine centre balala nung lir.



TIR YIMYIM YIMOBILEM (EDITORIAL)

DIMAPUR ROGONÜ, CHITENI (JULY) 03, 2020

Mapa junga inyakdaksüba

Nagaland nung gari lenmang yangluba yimya ya tanga state nung kasa sentong kübok gari yangluba mapatem den medemdangra, kenyongi am züdoka itta lir. Tanga state talangi mouaka, anameta Assam nung Amguri-Jorhat-Golaghat- Bokajan-Dimapur ajanga süidang, akhidang black topping oa aliba ajak tsük ta okdoker külenang lenmang medemmedema kümdaktsür külen longsang khen, ali khen ta ka madak ka ta tapu-tapu atua menüngtemer külenang tesüsa longsang aser lisem temerang den bitumen meyokteper black topping aoba angur. Item lenmangtem nungji senzüdangbo gari nung masü rong aser tayimtsü nung senzürang mesük, kenyongi matashir, anungji süngo jema lap top aser mobile phone nung nüngdak inyaka otetter. Iba jagi ainlen jajadanga mapa inyaka jajar asünungji, anogo kata melalu aser aniaponga memetet tesem ka nungi ka atonger. Iba ama lenmang ajanga arur kodang asen lima tongdir, gari anakshiba agi temang ajak loksaa oa shirang tenzüksü. Iba denji garibo tagitsü mali ajasaa aotsü. Lenmang tajung nung senzüba o tamajung na nung senzüba tajangzük aser takoksatemji itemji lir. Aji oda, kodang asen lima nung lenmang yangluba mapatem reprangdir, lenmang tejen nung to auyi terara apudoker longsang proktsü aser iba madak bitumen tatsük inyonga aotsü aser lisem o longsa na mezüteper menüngtsü. Atangji, lenmang nung tapok ajak atepyonga aoer asünungji yangluzüklibo lenmangji medemmedemer anisüngzüka senzütsü saka iba lenmang jagi mezüng tsünglu tzükba tashia metizükteti kaksaa aotsü. Iba kuliji asenok lima nung taoba mapang aser talisa taküm küm tetenzüklen yangluba lenmangtem agi sayutsü. Iba ama lenmang mejungi yanglubaji teinyakertemi tajangzük tali aginüba agi asü, tashiyim agi saru meshiba agi asü mesüra kar nembo senotsü angati shilem karbo lemezüka agütsütsüsa adokba agiar, teinyakertemi dang meteta lir. Koba kuli agi südir süang, nübortemi pei lima nung yimkong lenmang aser kiojen yanglubaji pei meyong yanglur ama angateta reprangshiranga anepalu masü tashi, nisunger jakla nung keta lirji, teinyakertem aikati pei dangbo nübortem temeimba meimabo meinyaktsü. Aji oda, tanga lima nunga government mapa inyakertemi shitak junga inyakbaji, talisa, nübortemi repranga inyakdaksüba agi nübortem nüken tsübua inyaker. Iba kasaji asen lima nunga government lenmang aser kiojen ya asenoki asen meyong ama bilema mereprang tashi kibur maliba oset akümtsü, anungji ajaki mashimashi inyaker toktsütsü. Iba kasaji tanü asen lima nung aser asenok lushu nung atalokba angur. Lenmang tajung aginüba agi aser terenlok arudaktsünüba agi asen lima nungbo nübortemi alimelena magi ser terenlok mapa inyakdaksür. Ajisüaka, aiben aikati junga meinyaker, anungji nübortembo yar-a mereprangshi aser sotsüa meyongshi ta ajak nung akoksar. Iba ama mapang ka nung Langpangkong Tzükong Mungdang (LTM) kübok Road Co-Ordination Committee-i Langpangkong ajangba National aser State Highway yangluba mapatem repranga shitak yangludaktsütsü merangbaji nübortem asoshi tenla tulu asütsü. Koba mapa südir süang, nübortemang overseer kümer, parnok ket nung DPR tejangja yur repranga meinyakdaksüra, asenok ama nisungibo tezübaba len aser tajangzük tuluba angulen dang apia inyaker toktsür orr alitsü. Iba amaji metetsümonga makoksatsüsa, tang LTM-i inyakba amaji karibo nüngsen agia aser nübodoka pei lima anüktsü kanga nüngdaka kümogo.

OLEMSABANG

ALAR MULUNGSENTSÜ MELENSHIR LENDENI APUSODI- OCET LEPLA (REJOINDER)

- T. Meren Paul, Kohima.

Asen Lenir aser Tesayur Wati Longchar, (Tesayur ta amshidi) Serampore nungi asenok Naga nung aser talisa Aor ajungmesoa aser temelenshitsu shisa lemsa tajung aika osang kaket ajanga kanga junga rateta agütsüba tawa tanü ka nungi maneni sentisa züngdagi. Talisa June 27 aser 28 nung züluba nung tansütsü aser tenyaksü mapa tajung aika shisema angur. Aji oda süaka June 27 anogo nung züluba nung o tajung aika rongnung odong mezüng nung (first para) ocetra nungji terajem peria magi o tesepra, tejemja aser tai tulu nunglokja zülua aliba angur anungji ni ajakprongla yamaji masüako ta lepla agütsünür. Mezüng puba nung Tesayuri asüngdangbaji "Mokokchung Town nung asen Aori Naga nung kin palala nem dokan amentsü para ki kowi agüja lir? " Iba tasüngdangba melangzüdang tamasa Mokokchung Town nung Tesayur-i ashiba kintem- Sema, Lotha, Konyak, Sangtam, Chang, Yimchunger (Yimchungro), Phom, khiamnungan nung kowi arua lidar aser parnok kowikati Mokokchung Towni shishilembatsü aru? Junga asüngdangya süa züngdang oko ma, aser parnok kowi kati Mokokchung Town nung ki kibur shir dangsa dokan amentsü para ki asüngdang magütsü ibaji tama jangjatsüla saka tabiji agi bo mashitsüla. Ajidang masü para ki tazüng mali nung tangar dokan mena aliba nung ni pa amenba nungto dokan shishinür kua ta asüngdang nung mezüng alisangji aridoker nisung tasen anir arunung nisungi ang masü Tsüngremia pelatsü na. Tesayur-i tuteta ashiba kin rongnung Sema nung ken mapang ka nung Mokokchung nung dokan aika mena liasü saka kodang Dimapur renloka akum parnok ajak pei ki tajung süa aliba dena yokdoker Dimapur shishilembatsü aser talitsü tesademba alidagi lua adok. Hau 1983 Ao-Sema tsüngda Mokokchung Town nung mepetmesü adokba sülen ishika anunga aliba temjia Mokokchung doktsür oadokogo.

Tanungba kin rong nung Lotha dak alaka tanga kin temji pei Yimti nung shishilemba mesütet nung asen Mokokchungi arua asen Aor den aser Tzumar den raktepa tokteptetsü no? Parnok kecha maka Mokokchungi aruer talitsü asoshi para ki aser Dokan amentsü ki ta ki anaprongla para agüja mejimena shishia takum letetsü no? Asenoki jembitsü temela saka mapa kuma inyaktetsü asü masü ta (practicable) junga asahdangtsüla.

Dokan amentsü/shishilembatsü asoshi para ki ka angutsüba dang masü, tenzüksü sen telong junga (Seed Money/Capital investment) nüngdaker. Asen nübor ano shishilembatsü tera mayang (business acumen), arena sendem agir shishilembatsü tenzüknung anogodong yokzükbaji chia anidaker aser kum eshika nung sendong (capital/principle) chimar dokan shibangtsüsa akumer. Tzumar tem ya aso aika shishilembaa aruba, bannia ta ajar aser parnoki sendong nungi techanu mepudaktsür saka asenokbo sendong chimar. Mapa keji südir süaka ajak nung tetoktepa ka lira aser Charles Darwin-i ashiba ama tashi taiba takum alir (survival of the fittest) tashi maiter samaa aoer.

Tanapuba nung, "saka tzumari sahib ta ajatsü aser mapang mashika nung parnokbo meindoktsü akok, mesüra merenshitsu akoktsü ta asüba agi parnok nem agütsü". Ibai Tesayuri pa mulung nung bilemba saka Mokokchung Town nung Aor ki kibur shinga mulung nung iba shisatsü dena malitsü ta nibo amanger. Saka Tesayur-i yamaji bushiteta lirabang ki kibur paika yagi yamaji inyaker ta züngdangba tejangja ashitsüla. Mokokchung nung dokan shishir Aso (generation) asem puba tashi ketsa ki memelenshi aliba ni metetbaa karbo lir, tat agi Lt. Imonungba (Longjang) er kidang Samson Dress ta sür dokan tejen ka lir, Lt. Arishinganger (Chuchuyimlang) kidanga Hills Hardware dokan lir. Ki kibur aser dokan kibur (Land lord & Tenant) tsüngda tangatettep tajung nung alir aser dokan ken amenokkaji par dokan meloksep tashi ketsa kidang kum masü putu renteta alir. Ni tanur asüadang kübo den Mokokchungi atudang item dokan nung shishi aser talisa ni bilemtetbaji Samson Dress dokan nung tola aser half pant alia asemba, Hills Harware nung kojai aliba nüklai arur aser ni tang kum 72 tain saka tanü tashi item dokantemji angur. Tzumaer ar ta sür aseni meindoknüdang kudasür meindoktsüaka, saka item tzumar dokan dangji ki kiburi mahajan ta ajar aser mahajanba jagi ki kibur dangji sahib ta masü Baba ta ajar aser akum tsüpur. Tesayuri Mokokchung kodang tesüsa semdang ar kum eshika jakdang Mian (Bangladeshi) nung Mokokchung nungi odaktsüba sülenbo asen Ao tsür Aori amenba dokan aika kümogo. Takokeribo Mokokchung nung business tulu inyak dagini. Ungma nung M. Bendangnükshi Longkumer, shiba Longkumer Gas Agency kibur lir pai Whole Sale eshika ama lir. Mokokchung nung Printing Press Tzumar indang kata mali ama bilemer. Mezüng Jamir Art Press liasü, iba sülen ACYE Press, Shoppe Press aser tang Ungma nung Tsükti Longkumer indang Longpok Offset Printing Press lir aser paisa Mokokchung nung Hotel tajungtiba Whispering Wind lapoka lir. Ano tanapuba Hotel tajungtiba Hotel Metsüben, Chuchuyimpang nung Moasangbai shishidaki. Mopongchuket nung Watitemjen, pai Travel Agency Mokokchung-Guwahati Service ayimpanga inyakdaka aser Aliba nung Bendangtoshi Lim Travel Mokokchung -Kohima kum aika senzüdaki. Yamaji senkar temibo pei akok tashi pei sasep nung amokpanga inyakdaka. Mokokchung nung Tea Stall dak alaka Hotel aser Restaurant ajak asen nisungi inyakba angur.

Lenir Tesayuri ashiba ama meinyakba shilem aika lir aser asenoki service sector aser hospitality sector nung meinyaktetbaji asenok tepok tulu aser nüpoaah (hajar) tulu meshir anungji asenoki mesapoba dang masü asen nüpu aaher mali kechiba süra tzumari jenjang talangba aser sen eshiba agi inyaksü mulunga lir. Jembishiyonga ajak pronglai sen dhalangba aser tajemba agi mapa renemtsu bilemer.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Alimai meinyakra Nigeria ya Rwanda amai akümtsü: Frank Wolf



Frank Wolf (File photo)

July 02, 2020: Taoba mapang Congress züngsem, Frank Wolf-i, Nigeria nung Khristantem anema inyakra aser US sorkari iba atemaji kecha meinyakta abajanga akhidang Rwanda aser Darfur nung nisung jenti tepsetba ama Nigeria nunga ataloktsü, ta metetdaksü.

Frank Wolf ya Virginia nungi mapang talangka Republican züngsem liasü aser 2016 küm Congress-i International Religious Freedom Act agizükba nung paia shilem agia lir.

Genocide Watch nungi Greg Stanton, Nigeria nung bishops aser religious freedom advocates den külemi Zoom call abajanga osangbenertem den jembidang paia shilem agi.

Iba sentong ya taoba hopta advocacy group- In Defense of Christians-i ayongzuka liasü.

"Alima aser US-i Rwanda nung atalokba mezüngshi aser iba mapang nungji nisung meyrjang aika tepset. Putiotsü nung atalokba tanaben atalokdar," ta Wolf-i ashi.

"Anogoshia Nigeria nung rara adokba aser nisung jenti asüba osang angashir. Nigeria nung tensa mejungi kümra ibaji abajanga temeket linüktema kongshitsü aser refugees million aika Europe densema tanga linüktemi aotsü," ta pai ashi.

2015 küm nungi tenzüka Nigeria nung Boko Haram kiralongrar telok aser Muslim Fulani telungpurtemi

Khristantem amakba mapang nisung meyrjang aika süogo aser aika prokshio.

Religious freedom advocates-i joko küm aika alima linüktem dang Nigeria nung rara ya "genocide" (nisung jenti tepsetba) ta sangdongtsüla, ta shia arudar.

Genocide Watch-i ashiba agi, tesüba küm 10 tsüngda Nigeria nung kiralongrartem aser Fulani Muslim nungeri nisung 27,000 dak tema tepsetogo aser 2010 nungi tanü tashi nung nisung timtiba tepsetbaji Nigeria nung Fulani telungpur aser Islamic kiralongrartem abajanga lir.

"Boko Haram-i Nigeria nung nisung 27,000 dak tema tepsetogo, aser ibaji IS kiralongrartem Iraq aser Syria na nung nisung tepsetba dang nungi kanga agia timba lir," ta Wolf-i metetdaksü.

Genocide Watch tentetsang, Stanton-i, 2012 küm Genocide Watch-ibo Nigeria nung Fulani jihadi-i nisung jenti tepsetba ya "genocide" lir ta sangdongogo, ta ashi.

Stanton-isa, "Iba teblemstü tulu anema alimai inyaksü atema kechi tetsükdaksü ali?" ta asüngdang.

Stanton-i, "Asen (US) embassy-i tang tashi iba ya 'genocide' lir ta menanzüker. Iba dak alia meimchir temeden atema inyakra teloktemia iba ya 'genocide' ta menanzüker. International Crisis Group-ia yamaji bilemer. Item ya kanga

akhümket organizations lir," ta metetdaksü.

Taoba hopta United Kingdom nung tatartem telok katia, Nigeria Middle Belt nung rara abajanga takoksa tuluba angurtemji Khristantem lir, ta shiogo.

Anglican Archbishop of Jos, Benjamin Kwashi-i, "Nisung jenti tepsetbaji Khristan yimtsüngtem nung lir. Anungji kodang onoki iba ya Khristantem anema 'genocide' lir ta shidir Nigeria sorkar densema alima nung sorkartem ibaji manganer," ta ashi.

"Parnoki iba ya aluyimertem (Khristantem) aser kiset shiruru metsühertem (Fulani Muslims) na tsüngda rara lir ta ashir. Akhidang nungi telok ana tsüngda raraa arur. Fulani nung ket nung raraba hadir lir, parnoki injang khaloktsür, nisung tepsetter, ki rongdoktsür aser chiyungtsü rizügdak jen rongdoktsür. Parnoki asalentong yanglua nisung tepsetter aser aridoker," ta Benjamin-i metetdaksü.

Stanton-i, 2015 küm nungi tenzüka Fulani telungpurtemi Nigeria nung tepsetba nisung 7,600 pronglaji Khristantem lir. Iba ya genocide lir, ta ashi.

"Tangbo Fulanis telungpurtem truck gari sünga mener arua Khristan yimtsüngtem amaker," ta paisa shisem.

Wolf-i, "Nigeria nung tang aliba American Embassy-i tamakok nguogo. Asenoki Nigeria nung US den amalitep inyaktetsüpur ketdangser, France aser England densema NATO linüktem den tongtepratepa inyaktetsüpur ketdangser ka nüngdaker," ta ashi.

Wolf-isa, "Temeja ketdangser ka shimtsü atema menor, yamaji anogoshia nisung timba asütsü," ta ashi.

"Kodang ketdangserji shimdir Secretary, Pompeo-i pa mesüra laji nungittsüla. Iba anema meinyakra Nigeria nung ano nisung meyrjang aika asütsü, aser ibaji abajanga Africa nung aliba linüktema kongshitsü," ta Wolf-i ashi.

ANO GO ABEN TSÜNGREM DEN

TELUMIBA BENJONG AKÜM

Esther aser la tembartem lumibaji Chuba tsüngdang mepishitsü asoshi terenemba liasü. Chubatsür aser lar kilir anogo asem tashi lumibaji bilemdangang! Kibubai la balaka tasü itdaksü. Lai sangdong, "Ni samara, ni samatsü!" (Esther 4:16). Mangyimba anogotem jagi pelatepba anogo sottsü. Chubai lai mepishiba mela. Anungji Yihuda nung "pelatep aser tenüngsang agütsü" (8:16). Tajepba melii asenok koda menütsü akoktsü? Mangyimba melii koda tsüngsangtsü? Yisui ashi, "Shirnoki mang ayimer parnok tepelatsü kechiaser parnok süneptsütsü," (Mt. 5:4).

Ninive Chubai Tsüngrem taochi asoshi nisung aser shiruru ajaki lumia ayimtentü ozüng agütsü. Parnoki kechi inyakra iba nung Tsüngrem pelaa liasü aser o bendangba agien (Yona 3:7-10). Noklang nok yimti aser jila ajak nung pretshidar. Temenen jateta adoker aser obendangba arulanglang. Ajemalua temulung meyipa aser sarasadem agi dang timtemji nokdangtsü akok. Shirnoki parnok teka abelen aser achichilen mebendangtetter parnok samatsütsü. Pai kodanga mulunga mali. Tsüngremji Kümtetdakba ka lir (4:11). Saka Pai mulungba atalokdaksütsü Pai akhanger. "Kü nüburttemi parnok sasa ajemaludi süra aser sarasademra... Ni parnok lima anebtsütsü" (2 Puti. 7:14).

Aikati telumibaji Tejen Lai nung amshia aruba yimya ka dang lir ta melamela ashir. Saka Tasen Lai nunga tamangertem lumiba nungi tajangzük agia aruba angur. Yisui Tenem nung sayutsüngidang ashi, "Kodang nenoki lumidir" (Lumira ta mashi) (Mt.6:16).

"Lumiba tetezü nendaka shisadanga," ta Oswald Chamberi (1874-1917) My Utmost for His Highest nung zülu. Nai maneni lumira tepela aser Tepela Benjongji ne meyong asütsü (Zek. 8:19).

Kibuba Yisu, lumia sarasademba nungi Tepela Benjong akümtsüsa lumitsü kü dang yariang. Amen.

Kanye West-i osangtajung ken tasen 'Wash Us in the Blood' saya

July 02, 2020: Grammy Award angur kentener, Kanye West-i 2019 küm osangtajung kensep 'Jesus Is King' aser Sunday Service Choir's companion kensep 'Jesus Is Born' sayaba sülen tawa pai osangtajung ken tasen "Wash Us in the Blood" sayaogo.

Kanye West-isa, pa indang kensep tasenba nungjaji 'God's Country' asütsü ta metetdaksü.

Kensep tasenbaji koba anogo nung sayatsüar tang tashi nungbo mesangdong.

"Wash Us In The Blood" ken nung kenjang yamai lir- "Holy Spirit come down, Holy

Spirit come down, Holy Spirit help now, Holy Spirit help now, Wash us in the blood."

"Wash Us in the Blood" music video ji Arthur Jafar-i direct asü, Dr. Dre-i mix asü aser kasa ken nung rap kentener, Travis Scott-ia shilem agia lir.

Osang angazükba agi, iba ken video tetenzüklen 'Black Lives Matter' longkak aitba sentong nung police ketdangser kati longkak aiterem dak asaloktsür. Video nungsa tanak nisungtem coronavirus tashidak agi shiranga kanga timtema tangu

sashiba noksa lir.

Music video tatembanglen Sunday Service Choir ken renemshiba tesem nung Kanye West'er jala, arrshi küm tenet, North West tsüngsanga sayur.

Ken tatembanglen Kanye-i "Wash us in the blood of Jesus, Holy Spirit come down, we need You now, wash us in the blood," ta azünger.

Taküm April ita GQ Magazine adok nung ken 54 playlist nung "Washed in the Blood" densema adok. "Jesus Is King" kensep nung Kanye West-i pai Yisu dak tamanga akaba lemsatepba ama pa

indang ken timbaka tetushi aser tekülem ken- Khristan rap kentem asütsü.

2019 küm West-i Yisu Khrista agizükba sülen linük tesem balala nung pai Sunday Service Choir den külemi shilem agia aruogo.

Yaküm November ita nunga West aser pa indang Sunday Service Choir-i Houston nung Joel Osteen'er Lakewood Church nung shilem agia liasü.

Lakewood Church nung lokti den jembidang jembidang West-i, "Mapang talangka Chuba ka liasü aser Tejen Lai nungi Tsüngremi ni jaa liasü, aser mojingia ni mapang

talangka minpronga aruogo. Kü taküm nung ni teküboktiba jenjang nung aliba mapang nung Tsüngrem kü den liasü aser kü nem mangdang agüja ni ajungmeso," ta ashi.

"Laishiba sülen anidakba abajanga asenok talenba ajak nungi salatsü. Yisui na talenba nungi salatsütsü," ta West-i ashi.

Yaküm November ita nungsa West-i Biblical opera production "Nebuchadnezzar," sayaa liasü. Nebuchadnezzar ya akhidang Babylon nung Chuba ka liasü aser Tejen Lai Daniel kaket nung iba Chuba indang shia lir.


OLONG PAITEP # 5508

1				2					3	
						4		5		
6			7							
					8		9			10
11										
12		13					14			
		15								
						16				
	17									
						18				

- | | | | |
|-----------------------|--------|-----------------------------------|-------|
| TIPILEN | | LANGTSÜNGLEN | |
| 1. Yakob tetsü | - (6) | 2. ___ gki | - (3) |
| 4. Mezüng nisung | - (4) | 3. Telungpur telok ka | - (2) |
| 6. Tasen lai kakat ka | - (5) | 5. Tsüngremi mezüng pöktetdaksüba | - (5) |
| 9. Au lanu | - (2) | 7. Tia | - (4) |
| 12. Tejen lai 21 buba | - (11) | 8. Yakob-er jabaso ka | - (5) |
| 15. Tekolak tembar | - (2) | 10. Abraham tebutü | - (4) |
| 16. Zütsüra anepsang | - (5) | 11. Rebeka kinungpu | - (4) |
| 17. Kain tenu | - (4) | 13. Esau tenu | - (5) |
| 18. Hana-er jabaso | - (6) | 14. Tzünglu tilala aru | - (4) |
| | | 16. Jafet tebu | - (3) |
| | | 17. Teka agi kongshi | - (2) |

OLONG PAITEP # 5507 TELANGZÜBA

- | | |
|--|---|
| TIPILEN : | LANGTSÜNGLEN : |
| 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso, | 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata. |



LANURTEMI TESAYUR ALOKBA DANG ASÜNGDANGYAR :

Lanur : Sir, "Warm asü dang tephi-temola ajak wakadok" tasa nenok taintemi jembiya angashir, ya kechi tetezü ar na?

Alokba : Nenoki shitak dang asüngdangogo. Nagaland state kümli Mokokchung DC bai yimtsüng ka nungi Independence Day nung yar-tsüngsangtsü jaok. Anepdang yakta saka sobu-solemstü renemteter yimdong süa apusodangji süsüponger ajaki "aka, aka" ta reprangdangji joko maremteti tsüngsangertemto Town piyong tsüngsanga ground atongdangbo lular, tetsung teben ajakji waker atongji, shitak mapang nungjibo metsüngsangtet akoba.

Lanurtem : Oh angatetogo, tang Nagaland Government amaia, Covid-19 Tonga marudangbo, "yamaji asütsü, yamai inyaksü" ta tesüngmangtsü renemshir ataba, tonga arudangbo komar ka asüba amato, saka inyakertembo onsara okrongseta inyakdarnii!

Lilir : WhatsApp

TANÜBO NAI LANGZÜANG

Q. Koba küm Indian National Science Academy (INSA) tenzük?

A. 1928 B. 1932 C. 1935 D. 1938

(Taruba adok nung onoki langzütü)

YASHI ADOK TELANGZÜBA : Indian Institute of Science (IISc)

NAI-A YA METETTER MA?




South Korea tsür kentener telok BLACKPINK-i tesüsa sayaba single "How You Like That" ajanga Guinness World Records title balala ajanzüktetogo. Iba ken sayaba mezüng anogo nung 'views' million 83.3 shi tongteta liasü.

'How You Like That' ken ajanga ajanzüktetba record tem:

- Most viewed YouTube video in 24 hours
- Most viewed music video on YouTube in 24 hours
- Most viewed YouTube music video in 24 hours by a K-pop group.

SUDOKU # 5549 TELANGZÜBA # 5548

	3		7		1	2	5	6		1	6	2	3	5	4	9	8	7
		6			5			8		8	4	3	2	9	7	5	1	6
		1		3	6	7		4		5	7	9	1	8	6	3	4	2
	7	5	4				3			6	3	5	9	4	8	7	2	1
				1		6				7	9	1	6	2	3	8	5	4
			2	7	9	1				4	2	8	5	7	1	6	9	3
9	2			5			7			9	1	7	4	3	5	2	6	8
		7			2		6			3	5	4	8	6	2	1	7	9
	8	4								2	8	6	7	1	9	4	3	5

OJANG LUTEP # 5097

- ARANMEJGJA :
- IBGAANSHA :
- AKAJ :
- TEREPOK :
- ESÜMRA :
- ETEMEMTBA :
- NGUN :
- YIMBAAMNGA :
- SÜIAKNYT :
- NGMETERA :

OJANG LUTEP TELANGZÜBA # 5096

MAPA MERANGA INYAKBA NUNG TEJANG MADANGIANG MALITSÜ KECHIASER TSÜNGREMI MOATSÜTSÜ

TAN HOPTA ATEMA - KOMA SÜLA ?

Q. Covid 19 tashidak wara pöktetba ajanga asen nisung bendanglen lia alirtem meyipa arurtem ya tanaben meyipa moi asen lima nungsa ali nunga koma süla ?



July 02, 2020 nü Raj Bhavan, Bhopal nung Madhya Pradesh Angh, Anandiben Patel aser Chief Minister Shivraj Chouhan nati tanü minister tenangzükba agirtem den külemi tangokba noksa nung angur.

India nung Covid-19 case lakh 6 jungogo aser nisung 17,834 süogo Linük nung Covid-19 atema samples 90,56,173 tendangogo

New Delhi, Chiteni/July 02 (Agencies): Tesüiba ghonda 24 tsüingda India nung ano nisung 19,148 dak coronavirus tashidak putetogo, aser ibaji densemabo linük nung nisung ajak agi 6,04,641 dak iba tashidak puteter, ta Brihostibarnü Union ministry of health & family welfare-i metetdaksü.

Tang linük nung coronavirus tashidak agi teshirangdakpur 2,26,947 lir aser nisung 3,59,860 bo anepadokogo, ta Health Ministry-isa metetdaksü.

Tesüiba ghonda 24 tsüingda linük nung iba tashidak agi nisung 434 asü aser ibaji densemabo tang tashi nung iba tashidak ajanga nisung ajak agi 17,834 süogo.

Iba tashidak agi tamajungba

kongshiba state- Maharashtra nung nisung 1,80,298 dak iba tashidak putet aser 8,053 asü. Tamil Nadu nunga nisung ajak agi 94,049 dak iba tashidak putet aser nisung 1,264 asü; Delhi nung nisung ajak agi 89,802 dak coronavirus tashidak putetogo aser nisung 2,803 süogo.

Linük nung Covid-19 atema samples 90,56,173 tendangogo, ta Centre sorkari metetdaksü.

India linük nung coronavirus tashidak atema akok tashi samples timba tendangtsü asoshi sorkari mera aika agia inyakogo aser ibaji ajanga kobi melii linük nung Covid-19 test crore 1 ajungtsü, ta Brihostibarnü Centre sorkari metetdaksü.

July 2, 2020 anogo tashi nung

samples ajak agi 90,56,173 tendangogo, ta sorkari metetdaksü.

Tang tashi nung linük nung testing labs ajak agi 1065 lir, aser iba nungjagi public sector labs 768 aser nija labs 297 lir. Anogoshia samples timba-timba tendangdar aser July 1 anogo kija nunga samples 2,29,588 tendangogo.

Tang alima nung coronavirus tashidak agi tamajungba kongshiba linük ponguji US (2,616,949), Brazil (1,402,041), Russia (654,405), India 604,641 aser UK (312,658) lir.

July 2, 2020 anepdang 10:58 ako tashi nung alima nung nisung ajak agi 10,514,028 dak coronavirus putetogo aser iba nungjagi nisung 5,12,311 süogo.

PM Modi aser Tir Putin nati tesendaktep tashi itshitsü bangjem

New Delhi, July 02 (Agencies): Brihostibarnü Ato kilonser, Narendra Modi aser Russia Tir, Vladimir Putin na phone ajanga jembiba mapang nung Russia aser India na tsüingda lenla ajak nung tesendaktep tashi itshitsü atema tenati bangjemogo.

Brihostibarnü Ato kilonser Modi-i Tir, Putin dangi phone süa World War II nung takok anguba sülen küm 75 ajungbamong sentong takok ngua amongba atema tenüngsang agütsüba den

külemi Russia nung linük temzüng yanglushiba atema vote agütsüba takok ngua tembangba atema tenüngsang agütsü, ta sorkar osang ka ajanga metetdaksü.

World War II nung takok ngur küm 75 ajungba nungtem nung tawa (June 24) Russia yimtiba, Moscow nung Victory Parade agiba mapang nung Indian armed forces-ia shilem agia liasü.

Modi aser Putin nati alima nung coronavirus wara ajanga timtem balala ajangshitsü aliba atema linük anati

inyakba indang lemsatsep aser Coronavirus tensa süiba sülen alima nung tayongzükba balala atema India aser Russia nati longjemer inyaktsü nungdak, ta bangjem.

Lenir anatisa taküm küm tatemlen linük ana senden mamen tashi linük ana tsüingda maneni tongtepratepa alitsü bangjem.

Modi-isa iba senden nung adentsü atema Putin India-i pelaa jaoker, ta metetdaksü.

Russia Tiria Modi-i phone asüba atema pelaba lemsatsep.

Covid-19 agi shirangertem yaritsü atema Plasma tenlatsüla: Kejriwal

New Delhi, July 02 (Agencies): Coronavirus tashidak agi shirangertem treatment nung yaritsü atema Brihostibarnü Delhi nung mezüngbuba plasma bank tenzükba sülen Delhi Chief Minister, Arvind Kejriwal-i, coronavirus tashidak agi shirangertem taneptsü anguba sülen anogo 14 lir parnoki plasma tenlatsü akok, ta metetdaksü.

Online ajanga osangbenertem den jembidang Chief Minister-i number- 1031 aser 8800007722 agütsü; nisungtemi plasma tenla agütsütsü atema item number ajanga tongteprateptsü akok.

Sorkari plasma bank ji Institute of Liver & Biliary

Sciences nung amenok. Kejriwal-isa, plasma therapy ajanga coronavirus tashidak agi shiranger asüba ajema akümtsü imlar, ta metetdaksü. Arrshi küm 18 aser 60 tsüingdapur aser temang tozük seret 50 dak temapurtemi coronavirus tashidak agi shirangertem yaritsü atema plasma tenlatsü akok, ta paisa shisem.

Plasma therapy inyakyim nung- coronavirus tashidak agi shirangba sülen anepadoker alirtem azü nungi antibodies agizüka coronavirus tashidak agi teshirangdakpurtem nem tuloktsür, aser ibaji ajanga coronavirus tashidak anema raratsü atema immune system tashi itdaksür.



July 02, 2020 nü Patna nung Rashtriya Janata Dal lenir, Tejashwi Yadav-i social activist, Krishma Rai-i RJD nung adenba sülen la nem membership slip agütsüba noksa nung angur.

July 6 nungi ASI monuments ajak lapoktsü

New Delhi, Chiteni/July 02 (Agencies): Archaeological Survey of India (ASI)-i ketdangtsüa anepaluba monuments ajak nüburtem atema July 6 nungi lapoktsütsü, ta Brihostibarnü Union Culture Minister, Prahlad Patel-i metetdaksü.

June ita nunga culture ministry-i ASI-i anepaluba monuments 3000 nungi monuments 820 bo lapokja liasü.

Central sorkari wazüka ayuba monuments aser ASI-i

anepaluba archaeological sites 3,691 shi coronavirus tashidak prokba nokdangtsü atema March 17 nungi shibanga liasü.

Union Minister-i, Union Health Ministry-i coronavirus dak sendakba tetuyuba ajak monument ketdangsertemi shidak beshitsüla, ta metetdaksü.

Patel-i twitter ajanga, "Ministry of culture aser ASI den külemi ni July 6 nungi monuments ajak tanaben lapoktsü atema telemtetba agiogo," ta metetdaksü.

Madhya Pradesh Cabinet ulushiogo

Bhopal (Madhya Pradesh), July 02 (Agencies): Taküm March 23, 2020 nü Madhya Pradesh nung Shivraj Singh Chouhan-i Chief Minister tenangzükba agiba sülen Brihostibarnü, July 2 nungang Cabinet ulushiogo.

Brihostibarnü Raj Bhawan, Bhopal nung state Angh, Anandiben Patel-i ketdangtsüa cabinet minister 20 aser ministers of state 8-i tenangzükba agidaksü. April 21 nüa Cabinet minister pongui tenangzükba agia liasü.

Congress nungi BJP nung adener MLA 22 rongnungi nisung 14 minister shimogo, aser iba nungjagi nisung 10 cabinet ministers aser pezü ministers of state shim.

Shivraj Singh Chouhan cabinet nung tesadang ka shibo tamalen Congress nung alirtem

lir. Taküm March ita nung Congress lenir, Jyotiraditya Scindia-i party toktsür BJP nung adenba ajanga state nung Kamal Nath-i aniba sorkar chirepa liasü. Pai pa den MLA 11 anisemer BJP nung aden.

Scindia pusemertem- Imarti Devi, Prabhuram Choudhary, Mahendra Singh Sisodia, Pyadyumna Singh Tomar, Rajwardhan Singh Dattigaon nung cabinet minister shim aser Brajendra Singh Yadav, Girraj Dandotia, Suresh Dhakad aser OPS Bhadoria nung ministers of state shim. Züngsem 230 aliba Assembly nung tang züngsem 206 lir; BJP MLA 107 aser Congress MLA 92 lir.

Menden tazüng 24 aliba atema kobi melii by elections agitsü.



New Delhi, Chiteni/July 02, 2020: Brihostibarnü New Delhi nung Delhi Chief Minister, Arvind Kejriwal aser Deputy Chief Minister, Manish Sisodia nati ILBS Hospital nung Plasma Bank semdangba noksa nung angur.

Myanmar jade mine nung anentsüh alua nisung 113 shi asü

Naypyitaw, Chiteni/July 02 (Agencies): Myanmar north tsütsü jenjang tulu aketba sentilong atudak anentsüh alua nisung tajemba agi 113 asü, aser ano tali süa alitsü südi, ta ketdangsertemi Brehostibarnü ashi, kong iba long atuba tesem nung jana bendenba awatsüng ka nung lao molushi aser tzi yimzüka alua yangji mapa inyaker aika anembang.

Kachin state kübok iba sentilong peria aliba Hpakant tesem nung inyakerteri long bendenba mapang tzunglu sashia aruba sülen molushi agi parnok nembang, ta fire service department ajanga Facebook post ka nung ashi.

Iba lendon nungi kümzüksü bushirtemi nisung tasü mang 113 nguteta lir, saka ano aika samar bushiteper, ta department ajanga ashi.

"Ano tasü mang molushi nung lir. Asürtem timba akümsü," ta yangji information ministry nung inyaker, Tar Lin Maung-i osangbener dang phone agi ashi.

Temzüng-ozüng shidam mamshi ali rongsen bushiba Hpakant tesem nungya anentsüh aser danga lendongtem kanga bulua ajurur,



Hpakant, Chiteni/July 2, 2020 : July 2, 2020 nü cellphone ajanga tangokba noksa nung rescuer temi Hpakant, Kachin State, Myanmar nung jade mining tesem nung anentsüh aludak nisung asüba temang bener aoba angur. Brehostibarnü iba lendong nung asür temang 113 ngutetogo, ta Information Ministry ajanga sangdong ka nung ashi.

kong Myanmar tesem balala nungi makamaiter arua mapa inyaker, saka küm pongu dak tema nung ibai tamajungtiba lir.

2015 küm sentilong atuba tesem ka anembang nisung 100 shi asü, aser iba sülen sentilong atuba industry nung temzüng ozüng tasen yanglushitsü atema nüburtemi ola tali adok.

Iba tesem nung nisung aika

asüba media ajanga sangdonga arur, aser item rongnung aika freelance "jade pickers" tem lir, shirnoki sentilong tanüktem bushir, koba miner temi mongujem yutsür.

Social media nung video prokshiba nung janareja tamajung awatsüng nung anenokba mapang miner tem tenemleni jena ao aser tsunami

ama molu nungteta adok.

Noksa nunga nisung tasü mang tem tarpaulin agi nembanger aliba nguogo.

Iba tesem nungi arishi küm 38 tain miner, Maung Khaing, shibai lendong atalokba ya angu, pai ashiba agi, tenem ama jana nangtena aliba chireptsü amai aliba pai noksa tangoktsü aoba mapang nisungtemi 'asemang, asemang!' ta ayimtenba ola angashi.

"Minute ka tsüngda tsünglangen aliba nisung ajak sama. Kü molungjang tazüng aküm. Tang tashi küdak asükjang adoker... Molu nung asonger nisungtemi teyari meshia ayimten, saka shingia parnok meyaritet," ta pai osangbener dang phone

ajanga ashi.

Iba lendong atalokba sülen teyari agütsüba lokti tentet ka nung züngsem, Than Hlaing-i ashiba agi, Brehostibarnü asürtem ya mining company tulu temi yutsüba jana nungi sentilong bushirtemi liasü. Lai ashiba agi, nisung 100 shi samar bushir aser nisung 30 mozü kidangi anir oa anepaludagi.

Nobel Peace Prize angur Aung San Suu Kyi'er sorkari 2016 küm sorkar tentetba mapang iba industry mürektetsü nangzük, saka temelenshi kangabo mali, ta activist temi ashir.

2016-17 küm Myanmar nung ketdangsertemi sen million \$750 jenjang iba sentilong 'jade' ya yoka liasü, ta Extractive Industries Transparency Initiative nung shilem ka ama sorkari sangdongba data nung shia lir.

Saka iba industry indang jenjang shidakba ya iba dang nungi kanga agi timba alitsü, ta mongintemi ashir. Iba sentilong ya timba China nung ayoker.

Tzüngsang majungba mechi yangji aliba ketdangsertemi nüburtem dang Brehostibarnü iba sentilong atuba tesemi maotsü shir liasü, ta Than Hlaing-i ashi.

"Asür kinunger nem sorkari teyari agütsütsü teimla mali, kechiaser parnok ya freelance miner tem lir. Iba ama lendong timtem nungi jenbua alitsü lenmang mangur. Nüburtemi taküm bendanga agütsür ali nangdena alidaki aor, kechiaser parnok atema lenmang mali," ta laisa ashi.

Putin-i 2036 tashi yimsü asütsü temeden agütsür

Moscow, Chiteni/July 02 (Agencies): Russia nungeri Vladimir Putin 2036 tashi linük tir inyaktetsü atema kishi lapokja constitution nung temelenshi atema vote agütsüogo, koba ajanga pa ano anaben tir atema tokteptetsü, saka tangatetba tai lir, ta iba maparen anemertemi ashir.

Vote shilem 100 azüngba sülen ketdangsertemi Brehostibarnü osang sangdongba nung, taoba mapang KGB tanishir shibai Russia nung küm 20 dak tema tir aser ato kilonser ama yimsü süa aru, pai tang kümsük 2024 nung tembangba sülen maneni küm trok kümsük anaben tashi inyaksü atema tokteptetsü, ta shia liasü.

Tetetzü arishi küm 67 tain Putin-i pa arishi küm 83 tashi yimsü sütettsü.

Central Election Commission-i ashiba agi, alima nung linük tulutiba nung vote shilem 77.9 azüngba nung constitution melenshitsü busema liasü. Vote shilem 21.2 dak tera agi dang timbai iba temelenshi maginü, ta ashi.

Commission nung tekolakba, Ella Pamfilova-i ashiba agi, iba vote ochishia agütsü aser ketdangsertemi tajungtiba nung maparen ajak shidak inyak.

Opposition politician Alexei Navalny-ibo balaka angateter aser iba vote ya metemsü aser Putin taküm piyong tir inyaksüsa yangluba 'illegal show' ka dang lir, ta ashir.

"Onoki kodanga iba result ya magizüksü," ta Navalny-i pa busemertem dang video ka ajanga ashi.

Navalny-i ashiba agi, tang

novel coronavirus tashidak wara aliba mechi opposition teloki longkak maittsü saka regional election nung candidate tem shilem agiba nungi nokdangra mesüra parnok indang result tai kümsüra küm tatemen ola tulu adoka longkak aittsü.

"Putin atema tetsübutibaji yimtong ya lir. Onok yimtong nung nisung meyerijang aika aser million aika maru tashi pai metoktsütsü," ta Navalny-i ashi.

Russia nunger dang Putin indang yimtenren sentong busemetsü ajungshia liasü, koba constitutional coup ka lir ta pa anemertemi ashir, kong iba sentong busemer nem talitsü ki tashi agütsütsü nangzüka lir aser ad campaign ka nung pension protection aser same-sex marriage nokdangba amala iba temelenshi nung constitutional amendment danga dena aliba shia liasü.

Coronavirus prokshiba azüoktsü mechi iba vote ya anogo tenet tashi agi aser Bodhbarnü tatembangba vote agütsü nüburtem aoba mapang Putin totuyuba kübok tanur alirtem indang account nung sen \$141 (India nunger sen 10,000 shi) inoktsü.

Moscow nung alir Mikhail Volkov-i ashiba agi, pai iba temelenshi busema vote agütsü. "Onoki temelenshi nüngdaker aser ni yangji dena lir," ta pai ashi. Saka aika iba atema jangrabangra balaka meliasü.

"Ni iba amendments indang mazüng. Na atema parnoki telemetba agir lira vote agütsütsü kechi nüngdak. Asen linük nung yamai dang lir - langka kar züngang aser vote agüjang. Ni

vote agütsüogo," ta vote agütsür Lyudmila-i ashi.

Linük nung iba vote agütsür shilem 65 liasü, ta election ketdangsertemi ashi.

Soviet dictator Josef Stalin sülen modern Russia nung lenir mapa talangtiba inyaksangji Putil lir, aser pai iba vote ajanga temelenshi koma alitsü, item indang kecha mashi.

Pai pa tarutsü atema ano telemetba magi lir, ta ashi.

Russia nung anogoshi COVID-19 tashidak ya nisung tasen meyerijang aika dak putetba mapang lir, aser pa anemertemi longkak maittet saka online ajanga vote ya atalatsü, aser tesem balala nung polling station tem amenoka aliba noksatem lemsa.

Bodhbarnü Red Square nung activist telok tila ka longkak aita parnok temang agi 2036 küm yanglu saka police temi parnok apu. Külen "No! Campaign" busemer dang vote agütsüba sülen Moscow nung aliba Pushkinskaya Square-i aotsü ayongzüka liasü.

"Asenoka taküm lir ta asenoki ketdangsertem dang nenshia ashitsü nüngdaker aser nisung million aikati Putin nem 2036 tashi yimsü mesüdaktsüner," ta activist Andrei Pivovarov-i video ka nung shia liasü.

Ajisüaka iba sentong nung shilem agütsü nisung ishika dang adenshi, kong police aika liasü, ta osangbener kati ashi.

Opposition yimten yimsüsürtemibo nisung noklang ishika sentong nung aden, ta ashir. Yangji adenertemi "Russia will be free" ta ayimten aser kari Putin mapa yutsütsüla, ta ayimtena liasü.

Botswana nung shiti noklang aika asü

Gaborone, Chiteni/July 02

(Agencies): Botswana nung aliba nüngtugu Okavango Delta nung mejangjai shiti noklang aika asü, ta ketdangsertemi ashi, saka parnok ya shikarir temi tepsetba masü, kechiaser parnok tebu shidak lir, ta ashir.

Linük balalai müketbanger aliba linük nungya alima nung shiti nütsüng timtiba lir, kong shiti 130,000 shi alitsü südi, ta asadangteter. Iba Delta kija nunga shiti 15,000 shi lir.

"Okavango Delta north tsütsü tesem ka nung shiti 356 asüba osang lir aser tang tashinung shiti 275 asüba jangjaogo," ta Department of Wildlife and National Parks nung tang teinyakdak director, Cyril Taolo-i osangbener dang ashi.

Shiti ya kechi agi asüar ano mejangjateti lir, ta pai ashi.

"Yangji shikariba maparen nung temolung malemba mali, kechiaser shirur dak tebu shidak keta lir."

Sample tem bendena tendangtsü atema South Africa, Zimbabwe aser

Canada linüktemi yokogo.

May ita nunga ketdangsertemi linük northwest tsütsü yimtsüng ana nung hopta ka tsüngda shiti tasü mang 12 nguteta liasü.

Tang tesüsa asüba ya wildlife conservation charity, Elephants Without Borders (EWB) ajanga shiti 356 asüba indang miimshia osang agütsüba media nung Bodhbarnü temai adokba sülen jangjatet.

Iba tesem nung shiti tem ya ita asem shi süa arur südi, ta EWB ajanga temolung melemba bilemer.

June 19, 2020 nü züluba osang nung ashiba agi, "shiti tasü mang shilem 70 bo tawa asüba, kar ita ka tejakdang asüba, shilem 30 kanga tasen, kar anogo ka nungi hopta ka tsüngda asüba lir."

"Shiti ya tain-tanur mesüra tetsü-tebong ta mali asüba kuli tajung lir," ta shia liasü.

Shiti taküm aliba aika tashi mait, tekongra, karbo akhi ama masü, junga mejajateti liasü, ta EWB ajanga ashi.



GOVERNMENT OF NAGALAND DIRECTORATE OF INDUSTRIES & COMMERCE

ADMISSION NOTICE

Community College Programme at Nagaland Tool Room & Training Centre, Dimapur for Academic Year 2020-21. The courses are offered under NSQF through Community College Programme under AICTE, MHRD. Course duration for **Diploma (Voc)** are for 3 years i.e.

S.No	Name of the Course	Diploma	Duration	Eligibility
1.	Diploma in Automobile (Voc)	Level I	1 Year	Class X pass and above
		Level II	1 Year	Dip. Level I Pass
		Level III	1 Year	Dip. Level II Pass
2.	Diploma in Electrical Equipment Maintenance (Voc)	Level I	1 Year	Class X pass and above
		Level II	1 Year	Level I Pass (Level II)
		Level III	1 Year	Level II Pass (Level III)

Application Form is issued at NTTC office, Dimapur on all working days (9:00 AM to 4:00 PM)

OR
Registration can be done ONLINE at <https://nttcdimapur.org.in/>
APPLY ON OR BEFORE 10TH JULY, 2020

Important information:

1. Students are applicable for scholarship under Deptt. of Higher & Technical Education
2. Registration fee of **Rs. 100/-** (rupees one hundred) only.
3. Admission to the course will be on first come first basis.
4. Hostel seats available.

For further details, visit the website: <http://www.nttcdimapur.org.in> • Email Id- nttcdimapur@gmail.com or contact the following enquiry numbers. 9365518726 / 9612435193 / 8787846646.
(Reception desk — 9366284595)

Sd/- Shri. K. Hokishe Assumi, Director
Industries & Commerce Deptt

New Industrial Estate, Sub-Jail Junction (Tinali), NH-36 Diphu Road, Dimapur: Nagaland



GOVERNMENT OF NAGALAND DIRECTORATE OF INDUSTRIES & COMMERCE

Admission Notice for the Academic Session 2020-21

Applications are invited from eligible candidates for Admission to 'Diploma in Tool & Die Making' Course (4 years specialization course in Tool Design and Manufacturing) at Nagaland Tool Room & Training Centre, Dimapur.

Eligibility:

- Class 10th Passed.
- Age should be between 16 to 19 years. (90% seats reserved for SC/ST candidates and also relaxation of three years in the upper age limit).

Application Form and Prospectus is issued at NTTC office, Dimapur on all working days (9:00 AM to 4:00 PM)

OR
Registration can be done ONLINE at <https://nttcdimapur.org.in/>
APPLY ON OR BEFORE 10TH JULY, 2020
Date of Interview : To be notified

Features:-

- Stipend amount of ₹ 500/- p.m. during the course or ₹ 600/- p.m. NEC stipend for meritorious students of HSLC exam.
- NTTC Scholarship (monthly) from the institute for merit students (semester wise).
- Incentives for students with 90% and above (month wise) in attendance.
- 70% & above in HSLC result — Direct & free admission.
- Company allowances between ₹8,000/- to ₹15,000/- p.m. in the 4th year during On-the-Job-Training/Industrial training period outside the state.
- Earning while learning Scheme shall be extended to willing candidates.
- Students of Diploma in Tool & Die Making are eligible for SBI Education Loan.
- 100% placement assistance in Private/Govt. Sectors.
- Hostel seats available.

For further details, visit the website: <http://www.nttcdimapur.org.in> or contact the following numbers. 9366284595 (Reception), 7005162525/7640832421/8787364436

Sd/- Shri. K. Hokishe Assumi, Director
Industries & Commerce Deptt

• Website: www.nttcdimapur.org.in • Email-ID nttcdimapur@gmail.com
New Industrial Estate, Sub-Jail Junction (Tinali), NH-36 Diphu Road, Dimapur: Nagaland



Tang ama tetsübutüsü tensa ka nung osangzülurtemi tasü itta aser bendanga nûbur tenzükba tatishitsü tajung sayuba tepela tamaitüsü nûngo kulikaket ka Rotary Club Mokokchung Tir, Allen Mark Longkumeri Mokokchung Press Club tir, Limalenden Longkumer nem MPC building nung agütsüba mapang tangokba noksa nung angur. Rotary Club-isa district administration-i anir police aser medical department kübok inyakertemi yakbang süa inyakba asoshi akhüm tutushi agüja kasa mapaji inyaka liasü. Mokokchung, July 2, 2020.

Pelaba Lemsateper



01/07/1981 - 27/06/2020

Onoki teti meima aliba asür Tsüngchinaro T. TAKOSANGLA mapang tatsüka shiranga lir ajungben iba lima toktüsü aoba anong nung tembartem, kiyongertem, kija aser loki tentet shirkokisa ozü asükhu den temeim lemsatepogo, nenok ajak dang kanga pelaba lemsateper. Ozüi nenok nem meyiba agütsüsü kecha maka nung asen Teyanglur Tsüngremi nenok ajak moajangma ta ozü sarasadem.

Talisa teküboklen agüja aliba lokti tentet aser nûbu tajungtem dang balaka pelaba lemsateper.

1. Dr & Dr Ngangshi K. Ao (MLA)
2. Er & Mr Imkongmar Longkumer
3. Kohima Mokokchung Senso Telongjem
4. Kohima Mokokchung Fellowship
5. Dimapur Mokokchung Senso Telongjem
6. Dimapur Mokokchung Fellowship
7. Kohima Ungma Senso Telongjem
8. Kohima Ungma Fellowship
9. Dimapur Ungma Senso Telongjem
10. Dimapur Ungma Fellowship
11. Dimapur Ao Baptist Arogo
12. Kohima Ao Baptist Arogo
13. Mokokchung Baptist Arogo
14. Artang Baptist Arogo
15. E.E PHE Rural Division Kohima
16. Antiok Mission.

~ Temeim kinungbu, Chirnur aser Adianutem.

Menungra Bilemteter

Temeim Oja,

Tanü na onok nungi pilar küm ka jungaka, nü temeim aser mapa tajungtem onoki bilemteterang nükztü alur aser temulung ayanger. Saka onoki metet na Kibuba den tesünep aser tepela nung lir, kong tejashi, mangyim aser tekangshi mali.

Oja, na ama onoka nükjidong tajung ka lir, aser kodang Kibubai onoka jadri, asenok ajak tepela nung ajuruteptsü sarasadema atar.

Nai toktüsü aoba temeim chirnur, semchirtem, adinu aser kinungertem.



Sennüklula (Asangma)
Tasüba anogo: 3/7/2019

Naga Council-i metetdaksür

Dimapur, Chiteni/July 02, (AGM) ya July 04, 2020 nü **2020 (TYO):** March 25, 2020 nü (Honibar) Naga Council agitsü aliba Naga Council - conference hall, Nyamo Lotha Road, Dimapur nung anepdang COVID-19 lockdown ajanga thija 11:00 ako nungi tenzükba agitsü.

liasü, iba dak sendakba nung osang ka sangdonger. Anungji, Councilor ajak iba senden nung aruagi adentsü asoshi mepishir, ta Naga Council Dimapur, President-i Council Annual General Meeting metetdaksü.

Tang, Arrla No.13 kübok agüja aliba tashi amshia, Naga Council Dimapur, President-i Council Annual General Meeting metetdaksü.

DC Peren-i tashidak agi kongshiba tesemtem sangdong

Peren, Chiteni/July 02, 2020 nung COVID-19 prokba (TYO): Dobashi Colony, Jalukie azüoktsü asoshi, item town aser meküta aliba tesem aser containment zone nung nisung Ward no. 5 Tening town nung senzusenbongba repringshima centre nungi kidang quarantine mittsü aser temüket ajak jung asütsü atema yokadoker alirtemdak junga shibangtsüsü atema, tim COVID-19 tashidak tejangja putetba Administrative Officer/Sub- aser Nagaland Sorkar ajanga Divisional Task Force for agütsüba Standard Operating COVID-19 dang Peren DC-i Protocols (SoP) tetuyuba nung tetuyuba agütsüog.

anidaka, Bresthibarnü Item tesem nung tashidak (02.07.2020) Peren Deputy puteta alir den ajuruteper nisung Commissioner Sentiwapang Aier ajak bushia tendangtsü aser tanga NCS-i tekalen agüja aliba medical inyakimtem agi melabatem achaayanga inyaktsü aliba tesemtem (containment asoshi DC-isa Medical zones) ama sangdongogo. Department dang tuyuogo, ta Iba den bendenloksema, lokti sangdong ka ajanga metetdaksü.

Premier League: West Ham-i goal 3-2 agi Chelsea kokogo

London, Chiteni/July 02, 2020 (Agencies): Bodhbarnü Premier League asayamung nung, West Ham aser Chelsea na tsüingda asaya liasü, kong asaya tatemlen minute 89buba nung Andriy Yarmolenko-i idaktsüba goal ka ajanga West Ham-i goal 3-2 agi Chelsea koka Premier League nung parnok maneni shilem agitsü asoshi lenmang lapokogo.

West Ham-i ano asaya trok nung shilem agitsü anünga lir, kong point asem ngutetba ajanga parnok relegation zone-i maiter.

"Iba season nung onoki bilemba ama masayatetti aruogo, saka tanübo item timtem ajanga onok mesotdaksü aser onoki tesüba indang teblemstütem khen yutsür asaya aser onoki iba takok ajanzüktetogo," ta West Ham nungi striker Michail Antonio-i ashi.

"Iba asaya kanga dang tasak liasü, kechiyong parnoki (Chelsea) kanga toktepa asaya, saka meimlaika team puri junga asayaogo aser iba takok ya tongtibang," ta Manager David

Moyes-i ashi.

Iba asaya tenzüker mezüing half nung West puri idaktsüba goal ka mapang agia VAR reprangshiba sülen iba goal magizükba den külemi minute 42buba parnoki asaya dak mapet yimya amshia Chelsea nem penalty ka metsütsü maongka agütsüba ajanga David team pur kanga tezüdangadok.

Chelsea pur penalty goal ya Willian-i idakja liasü.

Mezüing half nung minute ana apuloktsür asayaba mapang, Tomas Soucek-i team pur atema mezüing goal idakja Chelsea den goal 1-1 küma aser tanabuba half tenzüker minute 51buba nung Antonio-ia telok atema goal tanabuba idaktsü, saka minute 72buba nung Willian-isa Chelsea atema goal tanabuba idaktsüba ajanga Abdriy-i tasembuba goal meinoktsüdang telok ana tsüingda goal kasa shi küma liasü.

Iba tamakok ajanga, table point jenjang pezüba nung alir Chelsea team ya Champions League qualification atema merangba mapang, parnok point

ana agi dang Manchester United aser Wolverhampton tejakdang lir.

Maneni, kasa asayamung asaya tanga ka nung Newcastle-i Bournemouth madak goal 4-1 agi takok ngua liasü.

Bournemouth-i tamakok anguba ajanga, parnok Premier League relegation zone nung denogo aser top division season ka nung Bournemouth-i 19ben tashi tamakok nguogo, koba club atema record asütsü.

New Castle atema asayar Dwight Gayle, Sean Longstaff, substitutes Miguel Almiron aser Valentino Lazaro nungeri goal ka ka idaktsü. Second half tembanger mapang apuloktsür asayaba mapang Bournemouth atema Dan Gosling-i goal ka idaktü, koba ita asem tashi coronavirus wara ajanga asaya ajak anentsür sülen iba league tenzükhia asaya aruba nung Bournemouth indang mezüing goal asütsü.

New Castle-i Manchester United, Tottenham, Leicester aser Manchester City telok den asayatsü anünga lir.

Peter Fulton-i batting coach mapa toktsütsü



Canterbury, Chiteni/July 02, 2020 (Agencies): New Zealand cricket team indang batting coach Peter Fulton-i tang teinyakdak aliba mapa toktsütsü aser Canterbury nung head coach ama inyaktsü, ta Brehostibarnü New Zealand Cricket (NZC)-i ashi.

Taoba mapang New Zealand nung cricket asayasang Peter-i 2019 küm ang national team indang batting coach ama Craig McMillan melenzü, saka iba maongka tajung metoktsünüba ajanga pai batting coach mapa toktsütsü akümer.

"Ni imlaa ataba ama Canterbury nung head coach inyaktsü asoshi maongka nguogo aser team terenlok lidaktsütsü asoshi kü dak aketba sempet tajungtiba agi ni tenzütsü," ta NZC sangdong ka nung Peter-i ashi.

"Ni iba mapa agizükba ya tongtibangsa, kidang kü kinungtsü aser chirnurtem nem mapang timba agütsütsü aser iba den külemi ni talikdak asayartem sayutsü nukjidong nung iba maongka agizük," ta pai ashi.

Sri Lanka aser Australia nung New Zealand team cricket asayaba mapang Peter-a dena liasü. Iba den külemi England aser India 'home tour' nunga New Zealand team atema pai batting coach inyakogo.

2004 nung 2014 küm tsüingda Black Caps (New Zealand) atema Fulton-i ODIs 49, Tests 23 aser T20Is 12 nung asayaogo.

2017 küm cricket asaya nungi anenba mapang nungi, Peter-i

coach ka ama inyaktsü tebilemba nung Gary Stead den külemi New Zealand indang batting coach ama inyaka liasü.

Batting coach meinyakdang, Peter-i New Zealand Cricket indang winter training squad atema coaching staff nung aden, New Zealand Under 19s atema batting coach inyak, Christ's College First XI cricket team indang coach aser 2018/19 nung season ka atema Canterbury Kings nung assistant coach ama inyaka liasü.

Peter-i ashiba agi, iba ya tayongzükba tuluka lir aser taoba mapang Canterbury-i takok anguba tsüingsü nung asayartemi anidakba reprangtsü yongyaseter. "Black Caps pur den jangratema inyakogo, saka mapang talangka nungi head coach ka inyaktsü jangra liasü," ta Peter-i ashi.

International cricket sabang nung shilem agitettsü, Canterbury squad nung cricket asayar tajung adokdaksütsü jangraba Peter-i lemsatepogo. "International cricket nung asayatetsü club nung sempet tajung alir asayar kar lir aser parnoki tim nung anitetsüji kü mapa," ta Peter-i ashi.

"International cricket nung shilem agitsü asayartemi tongtibang mera agitetra, tarutsü nung Canterbury-i lenla kar nung takok tajung angutsü aser aji kü teimla," ta Peter-i shisem.

August 01, 2020 nungi Canterbury nung Peter-i head coach ama mapa inyak tenzütsü.

Kamal aser Sathiyani nati külem asayartem nem teyari agütsütsü

Chiteni/July 2, 2020 (Agencies): India nunger rongnung table tennis asaya nung temaba jenjang nung aliba asayar, Sharath Kamal aser Sathiyani Gnanasekaran nati COVID-19 tashidak pokteta timtem nung aliba mapang table tennis fraternity nungi züingsem 130 nem senotsü teyari agütsütsü. Tenati charity atema sen lakh 13 dak tema bendenogo.

Mezüingbo sen lakh 10 bendentsü asoshi nukjidong liasü saka sen timba bendentetba sülen tangbo tenati nisung 130 yaritettsü. Tenüingdakba asayartem nem khen atema sen 10000 (nisung shia) agütsütsü. Taoba asayar Neha Aggarwal-

ia, Sharath aser Sathiyani na nem teyari agüja arudar.

Ultimate Table Tennis (UTT) league promoter Vita Dani aser Niraj Bajaj natia tenla tajung agütsüogo.

Senotsü teyari ya asayar, coach aser Umpire tem nem agütsütsü, shirnok wara ajanga kanga mejungi kongshir lir.

"Onoki mezüingbo nisung 100 shi yaritsü asoshi sentong yanglu, saka telangzüba tajung anguba sülen tangbo nisugn 30 talila yaritettsü. Onoki Deobarnü tashi tenla agizüktsü aser iba sülen nisung kwi yaritettsü aji asateptsü.

"Ni tenla agütsür ajak dang kangasa pelaba lemsateper," ta

Sharath-i ashi.

Sharath aser Sathiyani na mezüingbo Chennai nung local coach ti yaritsü asoshi longjem. Iba sülen tena den Neha aden.

"UTT-i table tennis asaya ajungketba nung teyari agütsüba dang masü saka stakeholder aika nem teyari agüja arudar. Tang ama tensa ka kong taküm liyonga aotsü asoshi timtem ajangshiba mapang ka lir, iba amala mapang ka nung iba mapa ya kanga nüngdaka lir.

"Onoki teyari agütsüba ajanga tenüingdakbapurtem tashi itshidaktsütsü ta amanger," ta UTT co-promoters Dani aser Bajaj nati ashi.

West Indies cricket asayar tejen Everton alima nungi pilaogo

St. John's, Antigua & Barbuda, Chiteni/July 02, 2020 (Agencies): Cricket asayar mongin aser 'Three Ws' (Sir Everton Weekes, Sir Clyde Walcott and Sir Frank Worrell) nung züingsem tatembangbuba Sir Everton Weekes, Bodhbarnü arishi küm 95 nung süogo. Caribbean nung Everton ya iba saisapong (Cricket) ngutetsang/tenzüksüsang ama züingshir.

"Nüngtugu cricket asayar Sir Everton Weekes asüba osang angazüka onok mulung züreper," ta Twitter ajanga Cricket West Indies-i lemsatep.

"Asür kinungertem, medemerem aser alima tesem balala nung fans tem den onoki mangyim tejashi lemsateper. Asür tanela nem anisüngzük agüjangma," ta CWI-i lemsatepa liasü.

Nübur ajunga aoksadaktsüba/ tsübudaktsüba World War II tembangaba sülen West Indies team nung Barbadian Weekes-i

Clyde Walcott aser Frank Worrell na den külemi shilem agia liasü.

2006 küm Walcott asü aser Worrell 1967 küm iba akümlü nungi pila oadok.

Tanü, par asem nüngtem nung, Bridgetown kübok aliba national stadium ya Three Ws Oval nungja agütsür lir.

1948 aser 1958 küm tsüingda Weekes-i Tests 48 asaya aser pai batting average 58.61 nung run 4,455 yanglua liasü. Test cricket asaya nung pai run 207 yangluteta lir, koba asaya ka nung pa indang run timtiba asütsü.

"West Indies cricket atema pai (Everton) tongtibang shilem agiogo," ta CWI president Ricky Skerritt-i ashi.

"Everton ya aküm taket aser ajemaluba den tangar asoshi bilemstüba nisung ka liasü. Onok atema cricket tenzüksüsangji pa asütsü. Pa tanela nem anisüngzük agüjangma," ta Ricky-i lemsatep.

Everton ya cricket asayatsü

sempet den ang nisung-a tajung ka aser nüngtugu 'Ws' asem rongnung pa taembangbuba liasü. Sir Everton küna tsüingda tesendaktep tajung ayu aser taoba küm pa mozüki nungi anizükba sülen pa talidak Barbados-i oa pa den ajuruteptsü asoshi maongka angu. Iba mapang pa career indang jempitep. Pa ya kanga dang tesüingjem aser tongmelang den tangar den jungtepnüba nisung ka liasü," ta Ricky Skerritt-i ashi.

Everton, shiba 2019 küm temulungjang tashidak agi shiranga liasü, pai yimya balaka nung century 5 tashi atonga ajanzükteba densema century 15 tashi yangluogo, koba tanü tashi record lir.

Taoba mapang West Indies captain, Jeffrey Stollmeyer-i ashiba agi, Everton tar ya süklep 5 ser inch 6 asüyongjia pa tashitait nübu ka liasü."

1948 küm Jamaica nung England team den Test pezüba

asayadang, Everton-i mezüing century yanglutet aser iba mapang pai England nunger bowler

Gubby Allen, Maurice Tremlett aser Jim Laker nungeri aonba ball ajak azükkokteta run 141 yanglu aser wicket 10 agi England koka liasü.

Kasa küm, West Indies-i India tour nung asayaba mapang, Delhi nung Everton-i run 128, Bombay nung run 194 aser Calcutta nung run 162 aser 101 yanglua liasü.

Madras nung, Everton-isa century trokbuba atonga angutsü mangok angu, saka tia makai run 90 nung pa run out süadok.

1950 küm England nung West Indies-i series ka 3-1 agi akokba mapang Everton-i spinner Sonny

Ramadhan aser Alf Valentine naprongla nungita liasü. Trent Bridge nung pai half century asem aser century ka (run 129) yangluogo.

"West Indies cricket asayar mongin Sir Everton nem onoki aküm aser tetushi agütsür. Iba saisapong nung linük atema pai shilem tuluka agiogo. Pa onok rongnung densemba ya temoatsü ama züingshir, pa tanela nem anizüngzük agüjangma," ta Twitter ajanga West Indies Players' Association-i lemsatep.

"Sir Everton Weekes' asüba osang angazüka MCC aser Lord nung inyaker ajak mulung züreper. Everton ya West Indies cricket nung asayar tajungtiba ka ama teti bilemettsü," ta MCC-ia lemsatep.

BILEMDANGANG

"Asenoki dang tasüita inyakra, asen nukjidong ataloktsü."